

clurs

DECLARATION

DV ROY, SVR LA
REVNIION DES OFFICES DE
Controleurs des Elections avec les Es-
leuz, & reſtaſſement de leurs droicts.

23^e janvier 1616.

*Verifiee en la Cour des Aydes, le ſeiziesme
Decembre 1616.*



A PARIS,

Chez FED. MOREL, & P. METTAYER,
Imprimeurs ordinaires du Roy.

M. D C. XVII.

Avec Privilege de sa Majesté.

Case

1000

39

326

1617 fse

THE NEWBERRY
LIBRARY



O V Y S, par la grace de Dieu, Roy de France & de Nauarre, A tous ceux qui ces presentes lettres verront, Salut. Deuëment informez des contentions, procès & differends qui naissent iournellement entre plusieurs Esleuz & Controlleurs anciens, alternatifs & triennaux de nos Elections, pour raison de l'exercice, seance, droicts & émolumens de leurs charges & de la contrarieté des Arrests sur ce interuenus, qui les diuertit tellement de leur exercice, que nos affaires & nos subjects en recoiuent du preiudice: & que le mesme estant aduenü durant les regnes des feuz Roys Henry troiesme, & de feu Henry le Grand nostre tres-honoré Seigneur & pere (que Dieu absolve) Le seul moyen qu'ils auroient trouué pour y pouruoir, a esté d'attribuer ausdits Controlleurs lors creez, pareil pouuoir, qualité & exercice que lesdits Esleuz, & la iouissance des mesmes droicts, participation aux espices, & distribution de procès, rang & seance

en toutes assemblees des Officiers desdictes
 Elections, selon l'ordre de leur reception, à
 la charge que par bourse commune lesdicts
 Esleuz participeront aux droicts attribuez
 ausdits Controlleurs, pour la signature des
 bordereaux, quittances, & autres droicts à
 eux accordez, dont ne iouyssoient lors lesdits
 Esleuz, pour les departir également entr'eux,
 & tous prendre ladite qualité de Controlleur:
 Ce qui a reüssi pour les lieux où les Edict &
 Declaration pour ce faicts par nosdits prede-
 cesseurs au moys de May l'an mil cinq cens
 quatre vngt sept, & vnziesme de Decembre
 l'an mil cinq cens quatre vingts dixsept, veri-
 fiez en nostre Cour des Aydes, ont esté exe-
 cutez, & dont nous esperons que les faisans
 auoir lieu en toutes autres Elections de ce
 Royaume, comme nous auons esté requis par
 les Controlleurs y establis, lesdits differends
 cesseront, la iustice sera rendue avec plus de
 facilité & promptitude à nos subiects, & no-
 stre seruice plus dignement faict. A ces cau-
 ses, ayant esgard aux remonstrances desdits
 Controlleurs: De l'aduis de la Roynne Regen-
 te nostre tres-honoree Dame & Mere, & de
 nostre Conseil, Nous auons dict & declare,
 disons & declarons par cescdites presentes,
 voulons & nous plaist, que conformément

ausdites lettres d'Edict & Declaration du
 mois de May, mil cinq cens quatre vingts
 sept, & vnziesme de Decembre, mil cinq cens
 quatre vingts dixsept, tous les Controlleurs
 de nos Aydes & tailles anciens, alternatifs &
 triennaux des Eslections de ce Royaume,
 iouyssent annuellement & continuellement
 à l'aduenir de la qualité d'Esleu, sans distin-
 ction de l'annee de l'exercice dudit Control-
 le, rang, seance és assemblees desdits Esleuz,
 selon l'ordre de leur reception: ensemble des
 taxations, droicts de signature de roolles, de-
 partement des paroisses, cheuauchees, &
 autres droicts, tels & semblables dont iouys-
 sent les autres Esleuz qui ont esté reglez &
 ordonnez par le reglement general de nos
 tailles de l'annee mil six cens, & Edict de l'an-
 nee mil six cens cinq, à la charge que lesdits
 Esleuz participeront au droit de bordereau
 attribué ausdits Controlleurs, pour l'exercice
 dudit Controlle: Et auront & prendront les-
 dits Esleuz ladite qualité de Controlleur, en
 sorte que les vns & les autres se qualifient
 nos Controlleurs, Esleuz & Controlleurs de
 l'Eslection où ils sont establis, pour estre les-
 dits Officiers desdites Eslections, esgaux &
 vniformes en qualité, exercice de leurs char-
 ges & perception des taxations, droicts & es-

molumens qui leur sont attribuez, sans y pou-
 uoir estre troublez en quelque sorte & ma-
 niere que ce soit. Et d'autant qu'il y a plu-
 sieurs Elections où ledit droict de bordereau
 n'est estably, & qu'en aucune la finance a esté
 leuee, & les deniers en prouenans employez
 au remboursement desdits Controlleurs, qui
 est cause qu'il ne se fait à present aucun Con-
 trolle: Nous voulons & entendons que ledit
 droict de bordereau soit estably, imposé & le-
 ué en toutes les Elections de ce Royaume, à
 raison de douze deniers pour bordereau &
 par quartier de chacune leuee de deniers,
 dont il se fait roolle separé par les Assesseurs de
 nos tailles. Et pour euitier aux fraudes, abus,
 changement d'especes & diuertissement de
 nos deniers, au lieu de bordereaux, le Con-
 trolle sera fait sur les quittances desdits Re-
 ceueurs, & tenu registre dudit controlle par
 lesdits Esleuz, selon l'ordre de leur reception
 d'annee en annee, sans toutesfois que les Pre-
 sidents desdites Elections, en consideration
 de la residence qu'ils rendent aux Audiences
 & autres affaires concernans nostre seruice,
 soient abstraincts de faire ledit Controlle, si
 bon ne leur semble, ny pareillement l'Esleu
 en l'annee qu'il exercera ledit Controlle, re-
 nu de faire les cheuachees: Le tout sans di-

minution de leurs droicts de cheuauchees, taxations, signatures & autres droicts. Et pour iouyr par lesdits Controlleurs anciens, alternatifs & triennaux de ladite qualité d'Esleu, fonction, exercice, droicts & émolumens: Seront tenus de prendre nos lettres de prouision dans trois mois, qui leur seront expediees sur les quittances du Thresorier des parties casuelles, & taxe qui sera pour ce faicte par nostre Conseil sur lesdits Officiers, & non autrement. Si donnons en mandement à nos amez & feaux Conseillers, les gens tenans nos Cours des Aydes de Paris, Roüen, & Montferrand, que ces presentes ils facent lire & enregistrer, & du contenu en icelles iouyr & vser lesdits Esleuz & Controlleurs, cessans & faisans cesser tous troubles & empeschemens au contraire, nonobstant oppositions ou appellations quelconques: Car tel est nostre plaisir. En tesmoing dequoy nous auons faict mettre nostre seal à cesp dites presentes. Donnée à Paris le 23. iour de Ianuier, l'an de grace mil six cens quatorze, & de nostre regne le quatriesme, Signé L o v y s. Et sur le reply est escrit: Par le Roy, la Royne Regente sa Mere presente, Signé de Lomenie: Et seellé sur double queuë du grand seau de cire jaune. Et à costé sur ledit reply,

Leu, publié & enregistré par le commandement du
 Roy, porté par Monsieur le Comte de Soissons, assisté
 des sieurs de Themines, Marechal de France, de Cha-
 steau-neuf, de Pontcarré & Jeannin, Conseillers au
 Conseil d'Estat de sa Majesté: Oy & ce consentant le
 Procureur General dudit Seigneur. Fait à Paris en sa
 Cour des Aydes, les Chambres assemblees, le seiziesme
 iour de Decembre, l'an mil six cens seize.

Signé,

BERNARD.